

МЕСЯЦА ЯНВАРЯ В 25-ЫЙ ДЕНЬ.

ИЖЕ ВО СВЯТЫХ ОТЦА НАШЕГО ГРИГОРИЯ, АРХИЕПИСКОПА КОНСТАНТИНЯ ГРАДА,
БОГОСЛОВА

Аще хочет настоятель, творим бдение

НА МАЛОЙ ВЕЧЕРНИ

Стихиры, глас 4.

Подобен: Яко добля:

Богословными твоими устны, Богослове Григорие, * Богословным языком твоим изъявил еси * в Троице поемаго Бога Единосущнаго, * Отца, и Сына, и Духа Святаго, * изсушил еси буйство еллинов и лжу, * истину проповедуя * Боговещанными твоими глаголы.

И вид твой честен, * и зрак говеин, священный Григорие, * сего ради ты радостными песнопеньми почитаем и глаголем: * радуйся, звезда умная, * озаряющая концы светлостию * премудрых твоих глаголов; * радуйся, трубо, проповедующая миру * Иисусовы заповеди.

Многогласный орган, * гусли мусикийскую настроенную, * свирель же и цевницу сладкодышашую, * иерархов превысочайшаго, * великаго учителя Церкви Христовы, * да похвалим, поюще: * радуйся, благодати Божественныя глубино, * радуйся, вышото Небесных разумений, * отче отцев Григорие.

Пращею словес твоих * Божественных, Богодохновенне, * державно, преславне, поразил еси, * якоже волка, Ария, * и далече отгнав от стада Христова, * пастырю всеизряднейший, * твоя овцы согревая и прохлаждая * лаком Троицы Единосущныя. * Сего ради ты почитаем, * пастырю пастырей Григорие.

Слава, глас 6:

Иерархов начальника, патриархов честь, * таинника Боговидцев * и разумений Христовых ума краснейшаго, * сошедшеся, о Богомудрии, * духовными похвалами да похвалим, глаголюще: * радуйся, Богословия источниче, премудрости реко * и струя Божественнаго разума. * Радуйся, звезда светлейшая, * яко весь мир озаряеши твоими догматы. * Радуйся, благочестия поборниче великий * и нечестия прогонителю доблественный. * Но, о всемудре Богослове Григорие! * Не престай моляся Христу Богу * о иже верою и любовию совершающих присно * Богоугодную и честную память твою.

И ныне, глас 6:

Богородице, Ты еси лоза истинная, * возрадившая нам Плод живота: * Тебе молимся, молися, Владычице, * со святыми апостолы, * помиловати души наша.

На стиховне стихиры, глас 2.

Подобен: Доме Евфрафов:

Другий сын громов, * явился еси * от промышленности Божия, * и Богослов, Григорие, миру, * и ученик, и наперсник.

Стих: Уста моя возглаголют премудрость * и поучение сердца моего разум.

Яко сияние молнии, * изыде твое вещание, * верныя убо озаряющее, * еретики же низлагающее, * громовными стрелами.

Стих: Уста праведнаго поучатся премудрости, * и язык его возглаголет суд.

Ум твой огнесиянен, * пламеноносна уста, * имже еретичествующих, * Григорие, * попаляются безбожная учения.

Слава, глас и подобен тойже:

Троицу Честную, * Отца, Слово, Духа, * Божественный Богослов * научи веровати, * Единого Бога Нераздельнаго.

И ныне:

Единого Вседетельна * Троицы проповедуя, * из Девы прозябшаго, * еретиков заграждаеши, * Григорие, уста.

Тропарь, глас 1:

Пастырская свирель Богословия твоего * риторов победи трубы, * якоже бо глубины духа изыскавшу, * и доброты вещания приложишася тебе. * Но моли Христа Бога, отче Григорие, * спастися душам нашим.

Слава, и ныне, Богородичен:

Гавриилу вещавшу Тебе Дево, радуйся, * со гласом воплощашеся всех Владыка, * в Тебе Святем Кивоте, * якоже рече праведный Давид: * явилася еси ширшая небес, * поносивши Зиждителя Твоего. * Слава Всельшемуся в Тя: * слава Пропшедшему из Тебе: * слава Свободившему нас Рождеством Твоим.

НА ВЕЛИЦЕЙ ВЕЧЕРНИ

Поем Блажен муж: 1-й антифон. На Господи, возвах: стихиры на 8, глас 1.

Подобен: Всехвальнии мученицы:

Отче Григорие, * твоих устен * ни ходатай забвения гроб затвори: * Богословия бо явился еси уста, * благочестия догматы * и ныне вселенней вещая. * Темже молися * даровати душам нашим * мир и велию милость. [Дважды.]

Отче Григорие, * мудре плоти уклонился еси * благопробывательнаго и наветнаго, * на неботечную же всед * четвероконную добродетелей колесницу, * вперился еси к доброте неизреченней. * Еяже насыщаяся, * ныне подаеши душам нашим * мир и велию милость.

Отче Григорие, * Богу и человеком * был еси верен ходатай благодатию, * и ныне благомилостивна * благодерзновенными молитвами * положив нам Христа, * не престай Господа моля, преподобне, * даровати душам нашим * мир и велию милость.

Ины стихиры, глас 2.

Подобен: Киими похвальными:

Приидите, священными песньми * да восхвалим Богоглаголиваго Григория, * око благодати и всемудрая уста Духа Святаго, * светлаго светильника вселенныя, * велие Церкви оглашение, * славу Православия, * всечюдную Богословия струю, * Божественных догматов приснотекущую реку, * источник, всегда кипящий * нетления Божественныя воды. [Дважды.]

Любовию духовною днесь да воспоем иерарха, * апостолов единоправнаго * и благочестия поборника, * благоглаголания наводнение, * поток учительства, зело сладчайший, * словес высокоглагольных твердость, * небогрома уста, огнедышущий язык, * премудрости сокровище, Слова проповедника, * верных удобрение.

Песньми должными вси да восхвалим Богослова, * Христовы паствы стража, ловца волков * и всемудраго плевелов любодейчищных исторгателя, * сеятеля же правых догматов всечудаго, * отгонителя еретичествующих зело крепчайшаго, * возрастившаго же истинно бодростию Божественною Христовы таланты, * якоже лепо, и мир просветившаго * учений Божественными светлостьми.

Слава, глас 8:

Бодрый язык твой ко учению, * во ушесех сердечных возглашающий, * ленивых души возставляет, * и Боговещанными глаголы лествица обретается, * от земли к Богу возводящая. * Темже, Григорие Богослове, * не престай моляся Христу * от бед спасти души наша.

И ныне, Богородичен:

Царь Небесный, за человеколюбие на земли явился, * и с человеки поживе: * от Девы бо Чистыя плоть приемый, * и из Нея прошедый с восприятием. * Един есть Сын, сугуб естеством, * но не Ипостасию. * Темже совершенна Того Бога и совершенна Человека * воистину проповедающе, * исповедуем Христа Бога нашего: * Егоже моли Мати Безневестная, * помиловатися душам нашим.

Вход. Прокимен дне. И чтения.

Притчей чтение (главы 10, 3 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведе разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада, честная бо реку, и блажен человек, иже пути моя сохранит: исходи бо мои – исходи живота, и уготовляется хотение от Господа. Сего ради молю вас и предлагаю мой глас сыновом человеческим. Яко аз, премудрость, устрой совет, и разум и смысл аз призвах. Мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо, незлобивии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Премудрости Соломоновы чтение (главы 10, 6, 8 и 9):

Уста праведнаго капают премудрость, устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот и во благих своих плод правды обымет. Свет праведным всегда, и от Господа обрящут благодать и славу. Язык мудрых добрая свесть, и в сердце их почиет мудрость. Любит Господь преподобная сердца, приятни же Ему вси непорочнии в пути. Мудрость Господня просвещает лице разумнаго. Постигает бо желающия ю, прежде даже разумети ю, и удобь узрится от любящих ю. Утреневавый к ней не утрудится, и бдяй ея ради вскоре без печали будет. Яко достойных ея сама обходит, ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и поисках от юности моя. И взысках невесту привести себе, яко всех Владыка возлюбил ю. Таинница бо есть Божия хитрости и обретательница дел Его. Труды ея суть добродетели: целомудрию же и разуму та учит, правде и мужеству, ихже потребнее ничтоже есть в житии человеком. Аще же и многого искусства желает кто, весть древняя и быти хотящая рассмотрит. Свесть извития словес и разрешения гаданий, знамения и чудеса проразумеет и сбытия времен и лет, и всем советник есть благ. Яко безсмертие есть в ней и благославие во общении словес ея. Сего ради беседовах ко Господу, и помолихся Ему, и рех от всего сердца моего: Боже отцев и Господи милости, сотворивый вся словом Твоим и мудростию Твоею устройвый человека, да владеет бывшими от Тебе тварьми и да управляет мир в преподобии и правде. Дажь ми Твоих Престолов приседящую премудрость и не отлучи мене от отрок Твоих, яко аз раб Твой и сын рабыни Твоя. Посли ю с Небес от святаго жилища Твоего и от Престола славы Твоя, да, сущи со мною, научит мя, что благоугодно есть пред Тобою, и наставит мя в разум, и сохранит мя в славе своей. Помышления бо смертных вся боязлива и погрешительна умышления их.

Премудрости Соломоновы чтение (глава 4):

Праведник, аще постигнет скончаться, в покои будет. Старость бо честна не многолетна, ниже в числе лет исчисляется. Седина же есть мудрость человеком, и

возраст старости – житие нескверное. Благоугоден Богови быв, возлюблен бысть и живой посреде грешник преставлен бысть. Восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же видевшие и не разумевшие, ниже положше в помышлении таковое, яко благодать и милость в преподобных Его и посещение во избранных Его.

На литии стихира храма. Таже стихиры святого, глас 4, самогласны. Анатолия:

Словом Божиим отверз уста твоя, * премудрости привлекл еси Духа * и, полн благодати быв, * Божественная возгремел еси учения, треблаженне Григорие, * и, Ангельским совокуплься силам, * Тройческий проповедал еси Свет и Нераздельный. * Темже, твоими осиявшеся Богоглаголании, * Троице покланяемся, во Едином Божестве познаваемей, * во спасение душ наших.

Огненным языком твоим Богоглаголивым, Григорие, * богоборная попалил еси еретичествующих языкоболия, * Божественная яко истинно явился еси уста, * Духом возглаголавшая величия Божия * и писаньми вообразившая * сокровеннотайныя Троицы Единосильное Существо, * и, Трисолнечным светом просветив земный мир, * молишия непрестанно о душах наших.

Слава, глас тойже:

Божественными деяньми тело с душею законно очистив, * Богословия пределы прошел еси, * Божественным тайнонаучая, Богоявленне Григорие, * и, в незаходимый вшед мрак, * Богоначертанное приял еси законоположение, * Единосущную написану Троицу. * Ейже покланяющесе тобою, воспевающе, глаголем: * в Троице разумеваемая Единице, помилуй нас.

И ныне, Богородичен: Призри на моления:

На стиховне стихиры, глас 5.

Подобен: Радуйся:

Радуйся, Богословия источниче * и Богозрения высокога обитель: * вышнюю бо глубину, отче, * с благочестивым помыслом испытав, * всем уяснил еси * в Трех Солнцех Едино Света быти растворение, * соединяемое тождеством Божества, * троичествуемое же Честными Ипостасьми, * жития убо чистотою и словес светлостию * чествовати научая Троицу Всесвятую, Богодохновенне. * От Неяже низпослатися душам нашим моли велию милость.

Стих: Уста моя возглаголют премудрость, * и поучение сердца моего разум.

Зарею Богословия твоего * ересей темнонеистовство разрушил еси, * источник бо озарений * Богочестивым помыслом, Богослове, предварив и Богомудрым, * светлостем сущим, отонуду подаваемым, приобщился еси. * Просиятелен бо твой ум, якоже зеркало, соделавый, * Тройчный Божества, отче, Свет и Нераздельный * приял еси светлейший, * и Лучу, богато единственную, вместил еси, * Юже ныне умоли * душам нашим даровати велию милость.

Стих: Уста праведнаго поучатся премудрости, * и язык его возглаголет суд.

Радуйся, реко Божия, * яже присно полна вод благодати, * всяк веселящая град Царя Христа * Божественными словесы и ученьми; * сладостный поток, неисчерпаемая пучина, * догматов известный хранитель законный; * теплейший

Троицы поборник, * орган Духа Святаго, * ум бодрый, благогласный язык, * глубину писаний сказующий. * Христа ныне моли * душам нашим даровати велию милость.

Слава, глас 8:

Сердца верных земледелая языком твоим, Григорие, * благочестия в них присноцветущия израстил еси плоды Богу, * терновныя ереси посекая из корене * и украшая смыслы чистотою. * Темже, приемля наша похвалы, * Божественная цевнице, бодрое око, * пастырей пастырь, волков ловец, * молися прилежно, Богослове, Слову * о душах наших.

И ныне, Богородичен:

Безвестная Дево, * Яже Бога неизреченно зачениши плотию, * Мати Бога Вышняго, * Твоих рабов мольбы приими, Всенепорочная, * всем подающи очищение прегрешений: * ныне наша моления приемлющи, * моли спастися всем нам.

Тропарь, глас 1:

Пастырская свирель Богословия твоего * риторов победи трубы, * якоже бо глубины духа изыскавшу, * и доброты вещания приложишася тебе. * Но моли Христа Бога, отче Григорие, * спастися душам нашим.

Слава, и ныне, Богородичен:

Гавриилу вещавшу Тебе Дево, радуйся, * со гласом воплощашеся всех Владыка, * в Тебе Святем Кивоте, * якоже рече праведный Давид: * явилася еси ширшая небес, * поносивши Зиждителя Твоего. * Слава Всельшемуся в Тя: * слава Пропедевшему из Тебе: * слава Свободившему нас Рождеством Твоим.

НА УТРЕНИ

На Бог Господь: тропарь, глас 1:

Пастырская свирель Богословия твоего * риторов победи трубы, * якоже бо глубины духа изыскавшу, * и доброты вещания приложишася тебе. * Но моли Христа Бога, отче Григорие, * спаситися душам нашим. [Дважды]

Слава, и ныне, Богородичен:

Гавриилу вещавшу Тебе Дево, радуйся, * со гласом воплощашеся всех Владыка, * в Тебе Святем Кивоте, * якоже рече праведный Давид: * явилася еси ширшая небес, * поносивши Зиждителя Твоего. * Слава Всельшемуся в Тя: * слава Прошедшему из Тебе: * слава Свободившему нас Рождеством Твоим.

По 1-й стихологии седален, глас 3.

Подобен: Божественныя веры:

Божественное сияние наследовав, * житие невестественно изобучил еси, * единоименным священством преизяществовав, * преестественно бо уяснив догматы, * православием веру утвердил еси. * Отче преподобне, * Христа Бога моли даровати нам велию милость.

Слава:

Столп был еси Церкви, * богатство некрадомо благочестия явился еси, Богослове Григорие, * безстрастием уяснив житие твое и Троицы изъяснив догматы. * Отче преподобне, Христа Бога моли * даровати нам велию милость.

И ныне, Богородичен:

Божественная скиния была еси Слова, * едина Всечистая Дево Мати, чистотою Ангелы превозшедшая. * Паче всех мене, персть бывша, * осквернена плотскими прегрешеньми, * очисти молитв Твоих Божественными водами, * подающи, Чистая, велию милость.

По 2-й стихологии седален, глас 5.

Подобен: Собезначальное Слово:

Бодрствовав словом истины, * Тройческую державу Богословив, * Ариево злочестие и пребеззаконное злославие низложив, * яко благочестия доблественник и поборник, святителю, * просветил еси во тьме неведения седящия.

Слава, и ныне, Богородичен:

Души моя страсти многоболезненные и плоти моя недуги вскоре исцели, * ума моего блужения устави, Всенепорочная, * и в тишине помыслов молитвы приносили чисты Царю всяческих сподоби, Богородице, * и испросити прегрешений оставление.

По полиелеи седален, глас 8.

Подобен: Премудрости:

Обличая леств злочестивых, писания отверзая Боголепно, * послал еси догматы, паче меда наслаждающия верных сердца, * яве, досточудне, Троице служити во Единстве Божества. * Темже Спаса образ на иконе представил еси облобызати имуществительно человечество, * Богослове Григорие. * Моли Христа Бога грехов оставление даровати * празднующим любовию святую память твою.

Слава, и ныне, Богородичен:

Егда приидет судити всю землю всех Владыка и Творец, * овцам мя сопричти десным, осужденнаго, * и кроmeshня тьмы, и всякаго мучения * твоего непотребнаго раба исхити, молюся. * Да благодарно величаю богатство Твоя благости, * Богородице Всенепорочная, * и воию Ти, радуяся: * молися Христу Богу, прегрешений оставление дати мне, * Тебе бо имам надежду, раб Твой.

И чтем от жития святаго.

Степенна, 1-й антифон 4-го гласа.

Прокимен, глас 4: Уста моя возглаголют премудрость, * и поучение сердца моего разум.

Стих: Услышите сия, вси языцы, внушите вси, живуции по вселенней.

Всякое дыхание:

Евангелие от Иоанна, зачало 35, от полу.

Рече Господь ко пришедшим к Нему иудеем: аминь, аминь глаголю вам, не входяй дверьми во двор овчий, но прелазя инуде, той тать есть и разбойник. А входяй дверьми пастырь есть овцам. Сему дверник отверзает, и овцы глас его слышат, и своя овцы глашает по имени, и изгонит их. И егда своя овцы ижденет, пред ними ходит, и овцы по нем идут, яко ведут глас его. По чуждем же не идут, но бежат от него, яко не знают чуждаго гласа. Сию притчу рече им Иисус, они же не разумеша, что бяше, яже глаголаше им. Рече же паки им Иисус: аминь, аминь глаголю вам, яко Аз есмь дверь овцам. Вси, елико их прииде прежде Мене, татие суть и разбойницы, но не послушаша их овцы. Аз есмь дверь, Мною аще кто внидет, спасется, и внидет и изыдет, и пажить обрящет.

По 50-м псалме стихира, глас 6:

Преподобне преблаженне, святейший отче, * пастырю добрый и Началопастыря Христа учениче, * положивый душу за овцы, * ты и ныне, всехвальне Богослове Григорие, * проси молитвами твоими * даровати нам велию милость.

Канон Пресвятыя Богородицы со ирмосом на 6 и святаго два, на 8. Канон Богородицы, глас 8.

Песнь 1

Ирмос: Поим Господеви, * проведену люди Своя сквозе Черное море, * яко Един славно прославися.

Пречистая Богородице, воплощенное Присносущное и Пребожественное Слово паче естества рождающая, поем Тя.

Грозд Тя живоносен, всемирнаго искапающа сладость спасения, Дева Христа роди.

Род Адамль, к сущему паче ума блаженству Тобою возведенный, Богородице, достойно славит Тя.

Таже канон святаго, егоже краегранесие: Богоглаголиваго Григория приснопамятнаго пою. Творение Феофаново, глас 1.

Песнь 1

Ирмос: Христос рождается – славите! * Христос с Небес – срящите! * Христос на земли – возноситеся! * Пойте Господеви, вся земля, * и веселием воспойте, людие, * яко прославися.

Богослова втораго, столпа Света Небеснаго, мудрости Божия трубу, приидите, сего словес рачителие, любовию сопедшесе, восхвалим того, яко Богопроповедника.

Слово Отчее Безначальное, всех яко Бог промысленник, промыслительною силою тя, блаженне, Церкви, якоже матери, словом и мудростию облагодатив твой ум, дар дарует.

Ум владыку творя, страсти плотския удержал еси и, вместителен быв Божественных озарений, Единого Бога в Трех Лицах просветил еси ны чествовати, Григорие.

Богородичен: Божия мудрость храм Себе созда, в Твоей всенепорочней утробе вселившись, Благодатная, и паче ума Сему соединившись по Ипостаси, Чистая, явился яко Человек.

Ин канон, творение Космы монаха, глас тойже.

Песнь 1

Ирмос: Похвалу Боговидец Моисей Израилю предвозглашает, * начинает же Мариам премудрым женам песнь победную: * Избавителю Богу вси воспоем.

Избаву^е началороднаго, о наших же страстех кровь Боготочную, стал еси, в жертву принося, и ныне верным, Григорие всеумдре, Бога подаждь нам удобопримирительна.

Скрижали Богоначертанныя, во мрак Моисей вшед, прият некогда, ты же, во уме поставив Богоприятную трапезу, прилежно Бога умолил еси.

Богородичен: Хотя за благоутробие Свое от смерти и тли паки воззвати естество человеческое, Пребожественный, Дево Всенепорочная, в чистую утробу Твою вселися.

Катавасия: Сушу глубородительную землю:

Песнь 3

Ирмос: Ты еси утверждение притекающих к Тебе, Господи, * Ты еси Свет омраченных, * и поет Тя дух мой.

Даждь нам помощь Твоими молитвами, Всечистая, прилоги отражающи лютых обстояний.

Евы праматере Ты исправление была еси, Начальника жизни, миру Христа, Богородице, рождши.

Препояши мя силою, Всечистая, яже истинно Бога рождши плотию, Отчую Ипостасную Силу.

Ин

Ирмос: Прежде век от Отца рожденному нетленно Сыну * и в последняя от Девы воплощенному безсеменно, Христу Богу возопием: * вознесый рог наш, * Свят еси, Господи.

Имя премудрости источник, непрестанно источающ твоих всемудрых учений, Христову Церковь, всеблаженне, исполнил еси, над всеми вопиющую Богу: Свят еси, Господи.

Благочестия велегласен проповедник и благознаменит Богословия Богослов, сокровище Боговидения обильно предлагается и раздает богато нам богатство неотъемлемо.

Ритор огнедухновенный, Боговещанная цевница благодати, Богословным вдохновением и вещанием Богодуховным благознамените возшумев, Триипостаснаго Существа нам песнь воспе.

Богородичен: Богородительнице, Царице всея твари, Царя всяческих молящи не престай, Христа, Егоже нам родила еси на спасение сущих на земли, спасти поющия Тя.

Ин

Ирмос: Прежде зачатия честнаго Самуила * несомненно Богу обещавши священномати Анна, * ныне радующихся, поет с нами: * утвердися в Господе сердце мое.

Иже прежде изытия из утробы рождающей ты был еси предвозвещен, преподобне отче, пронаречение нося достойное, священноначальниче премудре. Вседушно,— радуйся, отче,— тебе зовем.

Иже прежде даже изволити лукавая, супружницу и споспешницу избрал еси изъявленными Божественными — Боговидную чистоту и целомудрие, поборниче верных. Веселящися,— радуйся, отче,— тебе зовем.

Богородичен: Евы праматере исправила еси прежде бывшее поползновение, приемши в Себе низверженные восправляющее Слово Отчее непобедимою силою, Мати Дево.

Катавасия: Утверждение на Тя:

Седален, глас 8.

Подобен: Премудрости:

Отверз уста словом Божиим, * отрыгнул еси премудрость, проповедниче Света, * и мудрование Божественное вселенней всеял еси, * отцев воистинну утвердил еси догматы, * по Павлу явился еси веры поборник. * Тем и Ангелов согражданин еси и сих собеседник явился, блаженне, * Богослове Григорие, моли Христа Бога прегрешений оставление даровати * празднующим любовию святую память твою.

Слава, и ныне, Богородичен:

Помышленными поползся лукавыми, во глубину впадох греховную * и, стена, зову Ти от сердца, Всечистая: * на мне удиви богатую милость, * и Твоего благоутробия безмерную пучину, * и щедрот Твоих неисчисленное богатство * и даждь ми покаяние и прегрешений прощение, да любовию зову Тебе: * моли Христа Бога прегрешений оставление даровати мне, * Тя бо надежду имею, раб Твой.

Песнь 4

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Клас возрастившая животворный, неоранная ниво, Подающего миру жизнь, Богородице, спасай поющия Тя.

Богородицу Тя, Всечистая, просвещшиися вси, знаем: Солнце бо правды родила еси, Приснодево.

Очищение нам даруй наших неведений, яко Безгрешен, и умири Твой мир, Боже, молитвами Рождшия Тя.

Ин

Ирмос: Жезл из корене Иессеева * и цвет от него, Христе, * от Девы прозябл еси, * из горы, Хвальный, приосененныя чаши * пришел еси, воплощься от Неискусомужныя, Невещественный и Боже, * слава силе Твоей, Господи.

Таинник Троицы быв, Сея просветил еси вселенную разумом, мудре, догматов лучи изблестая, преподобне, твоего известного учительства, емуже поучающеся присно, вси благочестно восхваляем тя.

Утро благочестия светлое, зарю трисолнечную в себе прием, возсиял еси, и ночь мрачную злочестивых ересей зарею твоих догматов мудрых отгнал еси, и души, отче, верных уяснил еси.

Ум Пресущный, источник Слова и Духа, из Присносущнаго Богословным громом, всеблаженне, Богословствуя, благочестно научил еси, сему от Него научаемь, яко предпочистив твой ум вещных, отче, приятий.

Возшел еси на гору добродетелей, от дольных преселився и мертвых дел отступив, и скрижали, рукою Божиею написанныя, догматы твоего чистаго Богословия приял еси, тайноводителю Божественных таинств, Григорие.

Богородичен: Разумом падшаго Адама возставила еси, Всенепорочная, Ипостасную рождши Жизнь из ложесн девических, очищенных Духом, и к безстрастной, и Божественнейшей, и нетленной пици сего возвела еси, Владычице.

Ин

Ирмос: С чудным став Аввакумом * на Божественней твоей стражи, Григорие, * и Суцаго на рамах Херувимских познав, * всемирнаго был еси возвеститель спасения, присно зовый: * слава силе Твоей, Господи.

Близ являющимся и пред Богом стоящим чиноначалием подобяся, всемудре, яже выше тех умом облетая, во глубину же не достигл еси превысочайшее стояние, оттоле богатство нося человеком неотъемлемое.

Внепостижимый вшед мрак и, яко из пещеры каменны, узрев задняя, срастворенное вещественное Невещественному Естеству, и неслитнаго смешения был еси сказатель, Христов угодник, Того рабом Его умоляет быти милостива.

Богородичен: Гора показалася еси Ты мысленная, от неяже отсечеса неизреченно честный Камень, истняя мрачныя прелести образ и просвещением благодати озаряя верою присно вопиющия: слава силе Твоей, Господи.

Катавасия: Покрыла есть Небеса:

Песнь 5

Ирмос: Утреннююще, вопием Ти: * Господи, спаси ны, * Ты бо еси Бог наш, * разве Тебе, иного не вемы.

Утоли нестерпимую бурю страстей моих, яже Бога Рождшая, Кормчию и Господа.

Служат Рождеству Твоему, Пречистая Богородице, Ангельстии чини и человеков собори.

Марие Богородице Безвестная, упования врагов осуети, а поюция Тя возвесели.

Ин

Ирмос: Бог Сый мира, Отец щедрот, * Великаго Совета Твоего Ангела, * мир подавающа, послал еси нам. * Тем Богоразумия к свету наставльшися, * от нощи утренююще, * славословим Тя, Человеколюбче.

Глагол твоих Божественное вещание и догматов благодать Божественная, яко скорость молнии, всю обтече землю, Троице во Единице, Единице в Троице, покланяться, Богослове, Богословствуя и научая нас.

Вожжелал еси истинно мудрости Божия, и словес доброту возлюбил еси, и всех предпочтил еси красных, сущих на земли, темже тя венцем, всеблаженне, дарований благолепно украси и Богослова содела.

Разумно ты Сущаго, яко древле Моисей, видети, Богоглаголиве, вожделел еси, и Сего задняя, камнем покрывся, видети сподобился еси, и пучины научился еси Божественныя мудрости, непостижно являемья.

Богородичен: Иже древле Еву, праматерь Твою, Создавый из Тебе зиждется, тоя осуждение и преслушание яве исцеляя и разрешая, яко Щедр и Владыка всех, Богородительнице Мати Дево.

Ин

Ирмос: Угль горящий, иже Исаиным устном Серафим приложи некогда, * клещею взем и приложен: он же, очищен,— правде научитесь,— всем проповедаше.

Всему огню Боговидения, всеблаженне Григорие, приступль, чистотою ума же и души несытне саморучно Трисиянный почерпл еси Свет Равновидный.

Зарями объят Трисолнечнаго озарения, от облистания же разжжен и Божественными лучами ум освещая, и противосиятельныя лучи всем изблистал еси.

Богородичен: Свет от Света, Отчее Единородное Слово Безначальное приемши, Мати Дево, дверь Света яве была еси, правды Солнце всем возсиявши.

Катавасия: Яко виде Исаия:

Песнь 6

Ирмос: Ризу мне подаждь светлу, * одеяйся светом, яко ризою, * Многомилостиве Христе Боже наш.

Храм Тя Божий, и ковчег, и чертог одушевленный, и дверь Небесную, Богородице, вернии, возвещаем.

Идолов разрушитель яко Бог, бывшее Рождество Твое, Марие Богоневесто, покланяемо есть со Отцем и Духом.

Слово Божие Тя земным, Богородице, показа Небесную лествицу: Тобою бо к нам сниде.

Ин

Ирмос: Из утробы Иону младенца изблева морской зверь, * якова прият. * В Деву же всельшееся Слово * и плоть приемшее пройде, сохраншее нетленну, * Егоже бо, не пострада истления, * Рождшую сохрани неврежденну.

Струями мудрых учений твоих, всеумудре, Ариев ум мутнейший изсушил еси, в тишине храня паству твою непотоплену, якоже словесный ковчег, в немже благочестия семена положил еси добротою словес твоих.

Да Честныя Троицы осиянием обогатиши ум, отче, уяснил еси, якоже нескверное и новоочищенное зеркало, воздержанием изрядным соделав. Темже и Боговиднейший показался еси Божественными явлеными.

Весь срастворився зарею Духа, был еси светильник, отче, всесветел, светлостию твоих словес просвещаяй концы и Богословия чистотою украшаяй красное торжество верных, Богослове Григорие.

Нов Самуил Богоданен явился еси, дан Богу, и прежде зачатия, всеблаженне, целомудрием и чистотою украшаемь и священства всесвятою одеждею, отче, удобрен, ходатайствуя Зиждителю и зданию».

Богородичен: Свиток чист, Слово приемый написанное, прежде неописанное, Божеством, предзналася еси пророки и первее, Мати Дево, Марие Богоневесто: Ты бо Неодержимаго во утробе Твоей несказанно вместила еси.

Ин

Ирмос: **И**же в понте подъемый заключение * убежанием бури и вержением жребия * и усты ят быв морскаго зверя, невредим пребыв, * но вопияше Иона: * к Тебе живот мой да взыдет, Христе.

Потоплен разумом не быв, и до dna испытав глубины Божия, и отголе бисер почерп ты Владыце, и молчание, якоже слово, Григорие, положил еси всеизряднейше.

Молитвою чистою сверепеющеся утишил еси море и, странных оплевав словес слатину», ты Владыце, яко Небесная капля, люди верныя исправил еси, Григорие.

Богородичен: Непостижное человеческими помыслы таинство, Мати Божия, неизреченнаго и страшнаго рождения Твоего: Ты бо, Дево, всех Творца рождши, Дева пребыла еси.

Катавасия: **В**озопи к Тебе:

Кондак, глас 3.

Подобен: Дева днесь:

Богословным языком твоим сплетения риторская разрушивый, славне, * православия одеждею, свыше истканною, Церковь украсил еси, * юже и носящи, с нами зовет, твоими чады: * радуйся, отче, * Богословия уме крайнейший.

Икос: **О**т Богословныя и высокия мудрости твоя исполни мой ум, убогий и страстный, яко да воспою житие твое, отче: не могу бо слова принести тебе, аще не ты подаси ми крепость слова, и разум, и мудрость, яко да от твоих твоя принесу тебе, и от богатства добродетелей твоих оттуду обрящу вину, и увенчаю честную и святую твою главу, с верными взывая: радуйся, отче, Богословия уме крайнейший.

Песнь 7

Ирмос: **О**т Иудей, дошедше, отроцы, * в Вавилоне иногда * верою Тройческою пламень пещный попраша, поюще: * отцев Боже, благословен еси.

Из девственных ложиш воплотився, явился еси на спасение наше. Темже Твою Матерь ведяще Богородицу, православно зовем: отцев наших Боже, благословен еси.

Жезл прорастила еси, Дево, от корене Иессеева, Всеблаженная, плод цветоносящий спасительный верою Сыну Твоему зовущим: отцев наших Боже, благословен еси.

Премудрости исполни вся и силы Божественныя, Ипостасная мудросте Высочайшаго, Богородицею, верою Тебе поющих: отцев наших Боже, благословен еси.

Ии

Ирмос: Отроцы, благочестию совоспитани, * злочестиваго веления небрегше, * огненнаго прещения не убояшася, * но, посреди пламене стояще, пояху: * отцев Боже, благословен еси.

Все желание и сладость яве слово твое, все, Григорие, полно веселия и светлости, благоухания насыщая верою поющия: отцев Боже, благословен еси.

Умом просвещенным Источника просвещении достиг еси и, отонудными молниями распалемь, опалил еси Евномиево языкоболие, Троице вопия: отцев Боже, благословен еси.

Отверз хляби бездны мудрых догматов твоих, заустив же Источника мудрости, покрыв еси прелести началовожди, облистаемь вечным Светом и Трисолнечным.

Богородичен: Яко дождь на руно, низшед, в Твою вселися утробу мира река, источник благодати, иже капли дождевныя исчисляя, отцев Боже, благословен еси.

Ии

Ирмос: Проидоша, яко чертог, * пещный пламень нестерпимый * иже за благочестие иногда отроцы святии, показавшася яве, * и, согласно воспевающе, песнь пояху: * отцев Боже, благословен еси.

Неправедных итемонов пред судищами став, Григорие, еретичествующих огня люте дышущая стремления благочестием сожег еси, Троице вопия: отцев Боже, благословен еси.

Троицу Всесвятую – догматов благочестивых, Григорие, немутный Источник, от устен излиывый на землю, цветоносну, жестокою напаяя, показал еси: отцев Боже, благословен еси.

Богородичен: Умерщвляется праотец, яко безвременне сада вкусивый; Ты же безконечную Жизнь, о Дево, прозябшая, в раи сего обитати возставила еси, Богородительнице Чистая Благословенная.

Катавасия: Тебе, во огни оросившаго:

Песнь 8

Ирмос: Царя Небеснаго, * Егоже поют вси Ангельстии, * хвалите и превозносите во вся веки.

Противных льстительныя и пламенныя на нас угаси стрелы, яко да поем Тя, Чистая, во веки.

Преестественне Содетеля и Спаса, Бога Слова родила еси, Дево, темже Тя поем и превозносим во вся веки.

Просветительную Тя и златозарную всельшийся в Тя Свет Непрístupный, Дево, показа свещу во вся веки.

Ин

Ирмос: Чуда преестественнаго * росодательная изобрази пещь образ: * не бо, яже прият, палит юныя, * яко ниже огонь Божества Девы, * в Нюже вниде утробу. * Тем, воспевающе, воспоем: * да благословит тварь вся Господа * и превозносит во вся веки.

Равно Отцу Слово и Дух благостию и царством, благочестиво научил еси, существенно и естественно тождество зная и единение. Темже вопиеш, радуяся: да благословит тварь вся Господа и превозносит во вся веки.

Славы Ангельския удостоился еси, яко бо Ангел, просиял еси миру, Троице, всеумдре, очистив прилежно душу же, и тело, и мысль. Ейже ныне воспеваеши, веселяся: да благословит тварь вся Господа и превозносит во вся веки.

Милостива молитвами твоими Владыку соделав, испроси, отче, прегрешений оставление верою священную и всепразднственную твою память празднующим. В нейже, веселящися, воспеваем: да благословит тварь вся Господа и превозносит во вся веки.

Таинник Триипостаснаго Единоначалия и Божества, суцаго в Троице, добродетелей обученьми быв, Тройческий Богослов показался еси, всеблаженне. И ныне воспеваеши, радуяся: да благословит тварь вся Господа и превозносит во вся веки.

Богородичен: Иже Архангельскими песнословии славимое богатное Слово нас ради обнища, Тя Матерь, доброту Иаковлю благословенную, избрав. Темже, воспевающе, поем: да благословит тварь вся Господа и превозносит во вся веки.

Ин

Ирмос: Иже пищею не осквернившийся отроцы царския трапезы * во огонь, радующися, внидоша некогда * и, в пламени орошаеми, * усердно пояху: * благословите, дела Господня, Господа.

Вавилонскаго, отче, пламене превозвысився и паче того благочестием распалився, Тройческий неботаинник показався и проповедник, вопиеш: благословите, дела Господня, Господа.

Напастныя различне, отче, и железныя пещи огонь уташая, удобно напастей произшед, к Небеси возлетел еси, вопия: благословите, вся дела Господня, Господа.

Богородичен: Златовидный светильник Твое знаменительне являше Божественное Рождество, Непорочная Чистая: Ты бо Свет Непрístupный миру возсияла еси, Емуже вопием: пойте, вся дела Господня, Господа.

Катавасия: Нестерпимому огню:

Песнь 9

Ирмос: Воистинну Богородицу, Тя исповедуем, * спасеннии Тобою, Дево Чистая, * с безплотными лики Тя величающе.

Радости и веселия полна есть память Твоя приступающим, исцеления точащи, и благочестно Богородицу Тя возвещающим.

Псалмы Тя воспеваем, Обрадованная, и немолчно,— еже радуйся! — зовем: Ты бо источила еси всем радость.

Красен, Богородице, прорасте Плод Твой, не тли причащающимся ходатайствен, но жизни, верою Тя величающим.

Ин

Ирмос: Образ чистаго рожества Твоего * огнепалимая купина показа неопальная, * и ныне на нас напастей свирепеющую угасити, молимся, пещь, * да Тя, Богородице, * непрестанно величаем.

Дает тебе жизнь нетленную Начальная Троица, Юже богословил еси, приемши Ея ради подвиги твоя, и учения, и борения, Ейже ныне, отче, предстоиши, о мире молитвенник изящнейший.

Зарею Трисиянныя светлости, от Единого происходящую Божества, осияемь, священнотаинниче Григорие, поюция тя верою спасай и твоих догматов Богословием световождствуй.

Течение доброе совершил еси, за Начальную Троицу подвизався, и обожение яко Богослов получил еси, и Божественнаго твоего желания исполнение приял еси достойно, Церквей благоуукрашение.

Богородичен: **О**, страшнаго Твоего чудесе! Ты бо, Богородице, таинство, прежде родов и прежде веков сокровенное в Бозе, всяческая Создавшем, рождши Бога Слова, несказанно явила еси.

Ин

Ирмос: Иже вышнюю глубину Божественнаго непостижения благочестно отверз, * ум, яко из камене, необъятныя * Богоначальныя возвысил еси Троицы, всеблаженне отче, тя величаем.

Иже худую одежду законнаго расторг писания и, юже в нем, Божественную доброту и таинственную Божественных Духа нам истолковав писаний, трблаженне отче, тя величаем.

Горним ликом сочислен сый, преподобне отче, ибо с ними во веки водворяешися. О твоей пастве мольбы твори к Богу, всеблаженне отче, тя величаем.

Иже Божественным научився от Божественнаго и паче ума вдохновения, преподобне отче, и к тех таинственно совершився ненаученному соединению безмерным твоим желанием, всеблаженне отче, тя величаем.

Богородичен: Ты вместилище, Чистая, Божественнаго необъятия, вышше естества была еси, яко Богу плоть заимствовавшая, и Твоих девственных не разверзшему ложех, внегда раждати без семене, Тя величаем.

Катавасия: В законе сени и писаний:

Светилен.

Подобен: Духом:

Меч словес твоих и сила сего языка отсеке неверных до конца, * яко вещь бо терновную, тех попалил еси безбожная новосечения, * Троице научил еси поклоняться боголепно, * Григорие Богослове.

Слава:

Подобен: Со ученики:

Единице Триипостасней и Троице совершенней в Едином Божестве, * всеумудре Богослове, научил еси поклоняться: * Свет, рекый, Отца и Сына Свет, * паки же Свет Духа Святаго. * Но Един Свет, Неразделен, Неслиянен, * Един бо Бог, уясняяй Единосушное, о Григорие блаженне.

И ныне, Богородичен:

С Богоматерию и Девою Марию * и Василием, всеумудре, предстояй Великим Непрístupней Троице, * мир миру, тишину Церкви и нам спасение испроси, ныне восхваляющим тя, * Богослове архиерею Григорие, риторе церковный.

На хвалитех стихиры святаго на 4, глас 4.

Подобен: Званный свыше:

Пресек письмене ты мрак, * вшел еси духом к Свету Высочайшему * и, отонудное прием светолияние, * Богословием вся обогатил еси, * Григорие всеумудре, Церкви светило, * блистаньми же словес твоих * мрачныя облаки ересей разгнал еси. * Темже водворяешися, идеже глас празднующих, * Ангелом собеседник, * моляся непрестанно, еже спастися душам нашим.

Богослов второй и таинник Божественнаго осияния, * иже Троицы светлый прописатель, * иже о неизреченном и Божественном естестве * преестественно научая, Григорие, * и ныне светлее наслаждая Бога, * почитающих тя поминай * и поборствуй о Церкви, юже собрал еси: * твое бо вещание во вся вселенныя изыде концы, * научая славити Троицу Единосушную.

Возделав землю языком, Богоглаголиве, * сердца браздам семя Божественное, * Богословием обогатил еси высочайшим Церкви всю полноту. * Темже плевелы огнем Духа * еретическия попалил еси, * философии Божественныя питаемый рачением, * отче отцев, и пастырю пастырей, * и слово верных, священников светильниче, * вселенныя слава, всеблаженне Григорие.

К премудрости чаши приближив * честная твоя уста, отче Григорие, * Богословия почерпнул еси Божественную воду * и верным обильно преподавал еси, * ересей заградил еси течение душегубное, * хуления исполненное. * Ибо яко кормчия ты обрете Дух Святыи, * отреюща и отгоняща, яко ветров дыхания, злочестивых стремления, * во Единце существа Троицу возвещающа.

Слава, глас 1:

Цевницу Духа, * ересей победителя и православных наслаждение, * второго наперсника Слова, * самовидца догматом бывшего, * мудраго пастыреначальника, * церковныя питомцы, Богословными песньми прирецем: * ты еси пастырь добрый, * давай тебе самага, Григорие, * яко Учитель Христос за вы, * и с Павлом ликуеши * и молишися о душах наших.

И ныне, Богородичен. Славословие великое и отпуст.

НА ЛИТУРГИИ

Блаженны от канона святого, песни 3-я и 6-я.

Имея премудрости источник, непрестанно источающ твоих всемудрых учений, Христову Церковь, всеблаженне, исполнил еси, над всеми вопиющую Богу: Свят еси, Господи. [Дважды.]

Благочестия велегласен проповедник и благознаменит Богословия Богослов, сокровище Боговидения обильно предлагается и раздает богато нам богатство неотъемлемо.

Ритор огнедуховенный, Боговещанная цевница благодати, Богословным вдохновением и вещанием Богодуховным благознамените возшумев, Триипостаснаго Существа нам песнь воспе.

Потоплен разумом не быв, и до dna испытав глубины Божия, и отголе бисер почерп ты Владыце, и молчание, якоже слово, Григорие, положил еси всеизряднейше. [Дважды.]

Слава: Молитвою чистою сверепеющеся утишил еси море и, странных оплевав словес слатину, ты Владыце, яко Небесная капля, люди верныя исправил еси, Григорие.

И ныне: Богородичен: Непостижное человеческими помысли таинство, Мати Божия, неизреченнаго и страшнаго рождения Твоего: Ты бо, Дево, всех Творца рождши, Дева пребыла еси.

Тропарь святого, глас 1:

Пастырская свирель Богословия твоего * риторов победи трубы, * якоже бо глубины духа изыскавшу, * и доброты вещания приложишася тебе. * Но моли Христа Бога, отче Григорие, * спастися душам нашим.

Кондак святого, глас 3.

Богословным языком твоим сплетения риторская разрушивый, славне, * православия одеждею, свыше истканною, Церковь украсил еси, * юже и носящи, с нами зовет, твоими чады: * радуйся, отче, * Богословия уме крайнейший.

Прокимен, глас 1: Уста моя возглаголют премудрость, * и поучение сердца моего разум.

Стих: Услышите сия, вси языцы, внушите, вси, живущии по вселенней.

Апостол к Коринфяном, зачало 151.

Братие, комуждо дается явление Духа на пользу. Овому бо Духом дается слово премудрости, иному же слово разума, о томже Дусе, другому же вера, темже Духом, иному же дарования исцелений, о томже Дусе. Другому же действия сил, иному же пророчество, другому же разсуждения духовом, иному же роди языков, другому же сказания языков. Вся же сия действует един и тойжде Дух, разделяя властию коемуждо якоже хочет.

Аллилуия, глас 2: Внемите, людие Мои, закону Моему, приклоните ухо ваше во глаголы уст Моих.

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник ест и нерадит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

Причастен: В память вечную:

На трапезе утешение братии. И чтем житие святого.